



„Los Casinos” a campeoniza den concurso musical

SAN NICOLAS. — Lago Heights Club na San Nicolas tabata e centro diahuebs anochi na unda varios agrupacionnan musical consistiendo di jovenan Arubano a reuni y brinda nan interpretacionnan cu a worde poni den balanza pa e shete miembronan di hurado, cu tabatin encargo pa dicidi cual di e diezun gruponan aki a ofrece lo mehor.

„Los Casinos”, un agrupacion joven recién lamta y cu ta dedica majoria di

nan repertorio na musica Venezolana, a hanja e majoria di punto for di e hurado integra pa Padu del Caribe, Carl Hicks, Hubert Booi, Hector Hasham, Ito Tromp, Oscar Steba y Mario Bislick. E grupo aki for di Oranjestad a obtene e cantidad di 633 puntos cu a hacian campeon di e concurso aki.

„The Black Diamonds” di San Nicolas a hira e sub-campeon cu 598 puntos, sigi como numero 3 pa e Trio Huasteca di Oranjestad cu 596 puntos.

E atencion major di e cuerpo di hurado a worde poni riba e calidad di nan presentacion na e publico, nan actuacion mes, nan musica y por ultimo nan voz. Y na mes momento cu e hurado tabatin tur atencion pa esaki, e sala jen jen tabata excita cu cada numero cu worde brinda.

E premionan

Entregamentonan di e premionan a tuma lugar ora cu sr. Addisson Croes, maestro di ceremonia y organisador huntu cu Lago Heights Club di concurso, a invita sr. Hubert Booi hefe interino di Toeristenbureau y miembro di hurado pa haci entrega di e premionan. Los Casinos a bai cu e copa ofreci pa Joyeria Kan y The Black Diamonds cu e premio obsequia pa fa. Jan C. Lacle. Segun nos a worde informa ta intencion pa organiza probablemente den curso di otro luna un concurso similar, e biaha aki pa Trionan y Mariachis.



„Los Casinos”, quinteto cu a titula campeon den e concurso musical di diahuebs anochi. D.r.p.d. Humphrey Kelly, Jossy Brokke Jr., Shirley Volkerts, Francisco Kelly y Luis Brugés.